

Universitäts- und Landesbibliothek Tirol

Franz Schwegger's Chronik der Stadt Hall

Schwegger, Franz

Innsbruck, 1867

Durchzüg der Wälschn

Durchzüg der Wälschn.

1546 Am 1. August seind zue Hall eingrittn umb die 10 ur vor mittag ungefärlch pey 2000 graisige pfärdt mit wälschn kriegsvolkh, seind über nacht in der statt pliben. Hat disen tag seer fast gregnet. Am morgen in aller früe um 3 ur der kays. mjt. zue geraist auf Regnspurg, nachmals auff Inglistat.

Zweiter durchzug der Wälschn.

Am 2. August seind zue Hall ankumen wälsch kriegsvolkh pey 78 fannlin ungefärlchen. Seind gschätzt worden auff 25000 man mit sambt dem tross, auch wälschn adl, so auff yr aigen khosten seind zogen, aber der rechtn soldatn seind geschätzt wordn pey 12000, der merer tail haggnschützn. Seind über nacht zue Hall pliben, in der statt, Vassergassn, zu Praitweg, auff der Schrammen, auch in den städln darpey. Ain ersamer rat hat in ain guet gleger und lossement lassn zuerichtn an der ndern lendt, haben aber pey dem öbristn und der kgl. regierung nit khünnen erlangen. Es ist auch disen und ander tag schonn wetter gewesen. Ier öbrister ist gewesen ain herzog Octavio von Camarin, ain junger herr, über 24 jar nit alt. Sein leidenant ist gewesen Alexander de Widello. Hat pey 40 teutsch trabanten ghabt, auch 10 edlknaben auf schönen pfärdn in seiner farb geklaidt, feyelfarb, mit sambt andern hofgesindt, auch pey 20 maulöslen mit güettern. Den andern tag all auff dem landt fuer Pamkirchn und Fump der kays. mjt. auf Ingolstatt zue.

Dritter durchzug, teütschn kriegsvolk.

Am 4. August seind zu Hall ankumen umb 1 ur nach mittag 10 fännl teütsch knecht, 5000 stark. Seind von der kays. und kgl. majestat angnumen worden in Schwarzwald, Preissgau, Heggau, Sungei, Lebertal. Sind über den Arlperg her khumen, haben ihr nachtgleger zue Hall in der statt ghalten, den andern tag durch Schwatz auff Rattberg, nachmal eylents der kays. mjt. zue. Dise 2 tag hat es fast gregnet. Sy haben auch mit ynen pracht pey 100 hauptvich oder khüe, so sy der statt Linda am Podnsee auff ainer alm haben erpeutt. Ir öbrister ist gewesen herr Bernhardt von Schumberg, seyn leydanant ain junger graff, Jörg von Helfenstein.